



Broj: 01-50-1-15-75/05  
Sarajevo, 7. marta 2006.

### **ZAPISNIK**

75. sjednice Predstavničkog doma  
Parlamentarne skupštine Bosne i Hercegovine,  
održane 7. marta 2006. godine

Sjednica je počela u 9,10 sati. Prisustvovalo je 40 poslanika.

Opravnado su odsustvovali Azra Hadžiahmetović i Nenad Mišić.

Iz Vijeća ministara BiH sjednici su prisustvovali: ministri Nikola Radovanović i Mirsad Kebo, zamjenici ministra Enes Bećirbašić i Dragan Mektić.

Sjednici Doma prisustvovali su i predstavnici Ureda za reviziju finansijskog poslovanja institucija BiH.

Iz međunarodnih organizacija sjednicu su pratili: Maja Ribar i Jelena Despot – OHR i Amra Agović – OSCE.

U uvodnim napomenama predsjedavajući Doma Nikola Špirić upoznao je poslanike o tome da su iz prijedloga dnevnog reda, dobivenog u pozivu za sjednicu, skinute dvije tačke:

- Prijedlog zakona o izmjenama i dopunama Izbornog zakona BiH –Ustavno-pravna komisija zatražila je produženje roka za razmatranje zbog velikog broja uložених amandmana i
- Izvještaj Zajedničke komisije o usaglašavanju identičnog teksta Zakona o zaštiti ličnih podataka, zato što se Komisija nije mogla sastati.

Predsjedavajući je također rekao da je u dnevni red uvršten zahtjev Vijeća ministara BiH da se po članu 104. Poslovnika razmatra Prijedlog zakona o izmjenama i dopunama Krivičnog zakona BiH.

**Predsjedavajući je iznio prijedlog Kolegija da se iz dnevnog reda izostavi Lista Ad hoc komisije za izbor i imenovanja članova Izborne komisije BiH, dok se, po zaključku Izborne komisije BiH, ne završi postupak o utvrđivanju sukoba interesa.**

U raspravi o prijedlogu dnevnog reda Tihomir Gligorić obavijestio je Dom da, u ime Mješovitog kluba poslanika SPRS – nezavisni poslanici, podnosi inicijativu za glasanje o nepovjerenju Vijeću ministara BiH, pročitavši i njeno obrazloženje.

U vezi s prijedlogom dnevnog reda, **Tihomir Gligorić** predložio je da se skine Zahtjev za hitno razmatranje Prijedloga zakona o izmjenama i dopunama Zakona o Ombudsmenu za ljudska prava u BiH (predlažaći: poslanici Nikola Špirić, Martin Raguž i Šefik Džaferović). Obrazlažući svoj prijedlog, Gligorić je, uz ostalo, prigovorio predlažaćima zakona što su prihvatili tekst koji je usvojen u Domu naroda, a zanemarili amandmane usvojene u Predstavničkom domu.

**Mladen Potočnik** pitao je zašto ni sada na dnevni red nije stavljeno pitanje autoputa i izlaza Bosne i Hercegovine na more, što je tražio još 8. novembra 2005. Predsjedavajući Špirić odgovorio je da je Kolegij zauzeo stav da će se i o tom pitanju raspravljati u okviru Izvještaja o aktivnostima na Projektu "Autoput na Koridoru 5c", koji je na dnevnom redu.

**Zlatko Lagumdžija** predložio je da se s dnevnog reda skine Informacija o problemima, planovima i transferu novca za potrebne Regulatorne agencije za komunikacije BiH i Javnog RTV servisa BiH, rekavši da je besmisleno da ostaje u dnevnom redu kada ni ovaj put nije dostavljena pisana informacija. Također je predložio da se s dnevnog reda skine Pregled zaključaka Predstavničkog doma, naglasivši da je trebalo da Dom dobije informaciju o realizaciji zaključaka, a ne pregled zaključaka. Zatražio je da Dom u vezi s ovim tačkama usvoji zaključak da se od Vijeća ministara BiH zatraži da dostavi materijale do sljedeće sjednice.

U raspravi o dnevnom redu Zlatko Lagumdžija komentirao je i pismo predsjedavajućeg Vijeća ministara BiH vezano za podnošenje informacije o rezultatima uvođenja PDV-a, koje su poslanici dobili na klupe, pa je zahtijevao da se Vijeće ministara BiH obaveže da Domu dostavi aktuelnu informaciju o rezultatima uvođenja PDV-a.

**Beriz Belkić** rekao je da Klub Stranke za BiH nije za to da se Pregled zaključaka skine s dnevnog reda, već da se povodom ove tačke usvoji adekvatan zaključak kako bi se zadržao aktivan odnos prema Vijeću ministara BiH da bi se došlo do informacije o realizaciji zaključaka.

**Petar Kunić** podržao je prijedlog Tihomira Gligorića za skidanje s dnevnog reda zahtjeva za hitno razmatranje Prijedloga zakona o izmjenama i dopunama Zakona o Ombudsmenu za ljudska prava u BiH. Naglasio je da nema osnova da se toliko insistira na ovom zakonu kao jednom od uslova za evropske integracije, a na drugoj strani se i ne spominje popis stanovništva, što je također jedan od uslova. Kunić je podržao i prijedlog Zlatka Lagumdžije da se s dnevnog reda skine Informacija o problemima, planovima i transferu novca za potrebe Regulatorne agencije za komunikacije BiH i Javnog RTV servisa BiH jer nije dostavljen pisani materijal. Naglasio je da u Domu o Regulatornoj agenciji za komunikacije BiH treba obaviti posebnu raspravu, te ponovo podsjetio na zaključak Doma o direktnom TV prijenosu sjednica Doma, koji još nije realiziran.

U vezi sa Prijedlogom zakona o izmjenama i dopunama Zakona o Ombudsmenu za ljudska prava u BiH, predsjedavajući Špirić odgovorio je da su članovi Kolegija, kao poslanici, iskoristili poslovničku mogućnost i, u dobroj namjeri, predložili da zakon ide po hitnom postupku, kako bi se napredovalo na putu ka evropskim integracijama, a na Parlamentu je da demokratski odluči. Što se tiče direktnog TV prijenosa sjednica Doma, obavijestio je da je Kolegij održao sastanak s rukovodstvom Javnog RTV servisa i da su obaviješteni da s njihove strane nema otpora, već da su još tehnički i finansijski limitirani od prijenosne kompanije i Parlamentarne skupštine BiH. Naglasio je da će se pokušati naći odgovarajući modusi da se sjednicama Parlamenta posvjeti dužna pažnja dok se ne osiguraju uslovi za direktan prijenos.

Povodom diskusije Petra Kunića o Prijedlogu zakona o izmjenama i dopunama Zakona o Ombudsmenu za ljudska prava u BiH, govorio je Šefik Džaferović. Rekao je, uz ostalo, da je poslovničko pravo svakog poslanika da podnosi prijedloge zakona, a da će svaki poslanik odlučivati prema svojoj savjesti.

**Milorad Živković** nije se saglasio s tim da se s dnevnog reda skine Informacija o problemima, planovima i transferu novca za potrebne Regulatorne agencije za komunikacije BiH i Javnog RTV servisa BiH, rekavši da se i previše kasni s ovom tačkom dnevnog reda, a informacija ipak nije dobivena. Naglasio je da su se u međuvremenu desile neke stvari u vezi sa RAK-om zbog kojih je možda i prevaziđena ovakva formulaciju tačke dnevnog reda, pa bi bilo dobro da ova tačka ostane, a da se urgentno traži i izvještaj u vezi s Regulatornom agencijom za komunikacije BiH.

**Momčilo Novaković** podržao je prijedloge Živkovića i založio se da pomenute tačke ostanu u dnevnom redu, a da se pripreme zaključci koje bi Dom usvojio bez šire rasprave.

**Mirsad Sipović** također se usprotivio skidanju tačaka s dnevnog reda jer se, kako je rekao, već pripremio za raspravu. Sugerirao je Kolegiju da nastoji ostvariti odgovornu funkciju i prigovorio da se stalno dešava da imamo veliki broj tačaka dnevnog reda i da se na samoj sjednici dostavljaju materijali, pa tako nije u stanju sve pregledati i proučiti, iako želi dati konstruktivan doprinos radu Doma. Izrazio je iznenađenje činjenicom da se ne može osigurati direktan TV prijenos sjednica Doma, kao i odnosom Vijeća ministara BiH prema Parlamentu, konstatirajući da ni sada na sjednici nema nikoga od članova Vijeća ministara BiH.

Govoreći o prijedlogu dnevnog reda, **Sead Avdić** skrenuo je pažnju na Memorandum o sporazumu između Vijeća ministara BiH i Vlade Republike Slovenije, naglasivši da je taj memorandum potpisan 19. maja 2003., na Vijeće ministara BiH došao je u decembru 2005., a u Parlament u februaru 2006. godine. Pitao je zašto ovakvi dokumenti ovako drastično kasne, a ako nema adekvatnog odgovora, predložio je da se Memorandum skine s dnevnog reda.

Predsjedavajući **Nikola Špirić** konstatirao je da je u raspravi bilo prijedloga koji su i za i protiv skidanja spomenutih tačaka, pa je rekao da je prihvatljiv kompromis - da spomenute tačke ostanu u dnevnom redu, a da se, bez duže rasprave, usvoje odgovarajući zaključci, što je prihvaćeno.

U daljnjoj raspravi o Prijedlogu zakona o izmjenama i dopunama Zakona o Ombudsmenu za ljudska prava u BiH iznesene su dileme da li se postupilo u skladu s Poslovnikom nakon što je prethodni zakon pao.

Sekretar Doma Branka Todorović kazala je da su članovi Kolegija, kao poslanici, u skladu s Poslovnikom, podnijeli Prijedlog zakona o izmjenama i dopunama Zakona o Ombudsmenu za ljudska prava u BiH, sa zahtjevom da se razmatra po članu 105. Poslovnika i da je on u skladu s Poslovnikom uvršten u dnevni red, te da ništa u vezi s ovim nije u suprotnosti s Poslovnikom.

Nakon tumačenja sekretara Doma, predsjedavajući Nikola Špirić konstatirao je da je za 75. sjednicu Doma usvojen sljedeći

## DNEVNI RED

1. Usvajanje Zapisnika 74. sjednice Predstavničkog doma;
2. Poslanička pitanja i odgovori;
3. Zahtjev Vijeća ministara BiH za razmatranje Prijedloga zakona o izmjenama Zakona o javnim nabavkama BiH po hitnom postupku, u skladu s članom 105. Poslovnika;
4. Zahtjev poslanika Nikole Špirića, Martina Raguža i Šefika Džaferovića za razmatranje Prijedloga zakona o izmjenama i dopunama Zakona o Ombudsmenu za ljudska prava u Bosni i Hercegovini po hitnom postupku, u skladu s članom 105. Poslovnika;
5. Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH, po hitnom postupku, u skladu s članom 104. Poslovnika;
6. Izvještaj Komisije Kolegija o nastojanju za postizanje sporazuma o Izvještaju Komisije za finansije i budžet o Prijedlogu zakona o izmjenama i dopunama Zakona o porezu na dodatu vrijednost (predlagač: poslanik Zlatko Lagumdžija);
7. Izvještaj Komisije Kolegija o nastojanju za postizanje sporazuma o Izvještaju Komisije za finansije i budžet o Prijedlogu zakona o izmjenama i dopunama Zakona o porezu na dodatu vrijednost (predlagač: poslanik Jozo Križanović);
8. Prijedlog zakona o primjeni privremenih mjera prema licima koja su optužena, a nisu dostupna Međunarodnom krivičnom sudu za bivšu Jugoslaviju i licima uključenim u pružanje pomoći licima optuženim od Međunarodnog krivičnog suda za bivšu Jugoslaviju (prvo čitanje);
9. Prijedlog zakona o dopunama Zakona Bosne i Hercegovine o izvršenju krivičnih sankcija, pritvora i drugih mjera (prvo čitanje) – predlagač: poslanik Momčilo Novaković;
10. Prijedlog okvirnog zakona o visokom obrazovanju u Bosni i Hercegovini, sa Izvještajem Ustavno-pravne komisije (predlagač: poslanik Momčilo Novaković);
11. Prijedlog zakona o dopuni Zakona o porezu na dodatu vrijednost, sa Izvještajem Komisije za finansije i budžet (predlagač: poslanik Dušanka Majkić);
12. Izvještaj Ureda za reviziju finansijskog poslovanja institucija BiH o izvršenoj reviziji:
  - a) Ureda za veterinarstvo BiH,
  - b) Ustavnog suda BiH,
  - c) Komisije za otvaranje i prihvatanje ponuda za korisnike budžeta institucija BiH,
  - d) Programa revitalizacije zgrade institucija BiH,
  - e) Arhiva BiH,
  - f) Komisije za imovinske zahtjeve raseljenih lica i izbjeglica – CRPC,
  - g) Ministarstva finansija i trezora BiH,
  - h) Parlamentarne skupštine BiH,
  - i) Komisije za zaštitu nacionalnih spomenika BiH,
  - j) Visokog sudskog i tužilačkog vijeća BiH.
13. Razmatranje:
  - a) Izvještaja o učešću pripadnika Oružanih snaga BiH u operacijama podrške miru u 2005., sa Zaključkom Predsjedništva BiH,
  - b) Odluke Predsjedništva BiH o upućivanju policijskih snaga Bosne i Hercegovine u operaciju podrške miru Ujedinjenih naroda u Sudanu.
14. Izvještaj o radu Zajedničke komisije za nadzor nad radom Obavještajno-sigurnosne agencije Bosne i Hercegovine za period april 2004. – decembar 2005.,
15. Izvještaj o aktivnostima na Projektu "Autoput na Koridoru 5c",
16. Informacija o problemima, planovima i transferu novca za potrebne Regulatorne agencije za komunikacije BiH i Javnog RTV servisa BiH;
17. Pregled zaključaka usvojenih na sjednicama Predstavničkog doma Parlamentarne skupštine BiH u ovom mandatnom periodu, zaključno sa 73. sjednicom;
18. Imenovanje tri člana u Zajedničku komisiju oba doma radi postizanja sporazuma o identičnom tekstu Budžeta BiH i međunarodnih obaveza BiH za 2006.,
19. Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o izvršenju budžeta BiH i međunarodnih obaveza BiH za 2006.,
20. Davanje saglasnosti za ratifikaciju:
  - a) Ugovora između Bosne i Hercegovine i Republike Makedonije o pravnoj pomoći u građanskim i krivičnim stvarima,
  - b) Ugovora o zajmu između Bosne i Hercegovine i Evropske investicione banke – Nacionalni put Banja Luka – Gradiška,

- c) Memoranduma o sporazumu između Vijeća ministara BiH i Vlade Republike Slovenije o proširenju donirane pomoći Bosni i Hercegovini u 2001.,
  - d) Ugovora o zajmu – Regionalni projekat željeznica između Bosne i Hercegovine i Evropske banke za obnovu i razvoj,
  - e) Protokola 14. uz Konvenciju o zaštiti ljudskih prava i osnovnih sloboda, koji se odnose na dopunu sistema za kontrolu konvencije.
21. Informacija SIPA-e o tragediji porodice Abazović iz Rogatice.

**Ad – 1:** Usvajanje Zapisnika 74. sjednice Predstavničkog doma

O Zapisniku nije bilo rasprave pa je usvojen jednoglasno (prisutna 33 poslanika).

**Ad – 2:** Poslanička pitanja i odgovori

Predsjedavajući je podsjetio da su za ovu sjednicu odgovore na pitanja dobili poslanici Muhamed Moranjkić i Ljiljana Milićević.

Odgovore su komentirali Muhamed Moranjkić i Ljiljana Milićević.

Postavljena su sljedeća pitanja:

**Mirsad Sipović:**

1. «Postavljam pitanje, jer imam uvjerenja, bio sam u kontaktu s ministrom Kovačem, da je meni trebalo da dođe pisani odgovor. Ne znam zbog čega treba 15 dana da mi stigne odgovor na poslaničko pitanje».

2. I drugo pitanje, također sam ga postavio na 72. sjednici – u kojoj je fazi i ima li namjeru resorno Ministarstvo civilnih poslova, s ministrom Safetom Halilovićem na čelu, da dostavi u parlamentarnu proceduru Zakon o sportu u Bosni i Hercegovini?»

**Ruža Sopta:**

1. Pitanje prometa roba označenih posebnim markicama, a koje su se zatekle na zalihama 31.12.2005. godine (pitanje obrazloženo u prilogu 1.)

2. Pitanje utvrđivanja carinske osnovice za pivo (pitanje obrazloženo u prilogu br. 2)

3. Pitanje diskriminiranja domaće proizvodnje u odnosu na uvoz gotovih proizvoda (prilog br. 3).

Prilozi su sastavni dio pitanja i obrazloženja.»

**Ad – 3:** Zahtjev Vijeća ministara BiH za razmatranje Prijedloga zakona o izmjenama Zakona o javnim nabavkama BiH po hitnom postupku, u skladu s članom 105. Poslovnika

U raspravi o ovoj tački učestvovali su: Dušanka Majkić, Jozo Križanović, Petar Kunić, Beriz Belkić, Ljiljana Milićević i Milorad Živković.

Sa 26 glasova za, pet protiv i dva suzdržana (iz Federacije BiH za je glasao 21, iz RS 5), usvojen je zahtjev za hitni postupak.

Također je usvojen i Zakon o izmjenama Zakona o javnim nabavkama. Za je glasalo 30 (Federacija BiH 24, RS 6) protiv devet poslanika.

**Ad – 4:** Zahtjev poslanika Nikole Špirića, Martina Raguža i Šefika Džaferovića za razmatranje Prijedloga zakona o izmjenama i dopunama Zakona o Ombudsmenu za ljudska prava u BiH po hitnom postupku, u skladu s članom 105. Poslovnika

Nikola Špirić obrazložio je razloge za podnošenje ovog prijedloga zakona i zahtjev za hitni postupak.

U raspravi o zahtjevu za hitni postupak učestvovali su: Tihomir Gligorić, Nikola Špirić i Marija Perkanović.

Sa 26 glasova za (Federacija BiH 20, RS 6), šest protiv i jednim suzdržanim, usvojen je zahtjev za hitni postupak.

U raspravi o Prijedlogu zakona diskutirali su: Zlatko Lagumdžija, Ljiljana Milićević, Petar Kunić, Mirsad Sipović, Marija Perkanović i Tihomir Gligorić.

Poslije rasprave, usvojen je Zakon o izmjenama i dopunama Zakona o Ombudsmenu za ljudska prava u BiH. Za je glasalo 26 (Federacija 21, RS 5), protiv pet, suzdržala su se tri poslanika.

**Ad – 5:** Zahtjev Vijeća ministara BiH za razmatranje Prijedloga zakona o izmjenama i dopunama Krivičnog zakona BiH, po hitnom postupku, u skladu s članom 104. Poslovnika

Bez rasprave, Dom je usvojio zahtjev Vijeća ministara BiH da se Prijedlog zakona o izmjenama i dopunama KZBiH razmatra po članu 104. Poslovnika.

**Ad – 6:** Izvještaj Komisije Kolegija o nastojanju za postizanje sporazuma o Izvještaju Komisije za finansije i budžet o Prijedlogu zakona o izmjenama i dopunama Zakona o porezu na dodatu vrijednost (predlagač: poslanik Zlatko Lagumdžija)

Predsjedavajući je rekao da u Kolegiju nije postignuta saglasnost o Izvještaju Komisije za finansije i budžet o Prijedlogu zakona o izmjenama i dopunama Zakona o PDV-u i podsjetio da se u drugom krugu glasa o Izvještaju Komisije.

Kratko je diskutirao Zlatko Lagumdžija.

Prilikom glasanja u drugom krugu, za Izvještaj je glasalo 18, a protiv 16 poslanika.

Predsjedavajući je konstatirao da je Izvještaj Komisije usvojen i da je Prijedlog zakona o izmjenama i dopunama Zakona o PDV-u pao.

**Ad – 7:** Izvještaj Komisije Kolegija o nastojanju za postizanje sporazuma o Izvještaju Komisije za finansije i budžet o Prijedlogu zakona o izmjenama i dopunama Zakona o porezu na dodatu vrijednost (predlagač: poslanik Jozo Križanović)

Predsjedavajući je podsjetio da nije postignuta ni saglasnost o Izvještaju Komisije za finansije i budžet o ovom prijedlogu zakona.

Jozo Križanović je u kratkoj diskusiji podsjetio poslanike na to šta se predlaže ovim zakonom.

Nije bilo rasprave, pa je predsjedavajući Izvještaj Komisije dao na glasanje u drugom krugu.

Za Izvještaj je glasalo 18, protiv 16 poslanika.

Predsjedavajući je konstatirao da je usvojen Izvještaj Komisije za finansije i budžet i o ovom prijedlogu zakona i da je zakon pao.

**Ad – 8:** Prijedlog zakona o primjeni privremenih mjera prema licima koja su optužena a nisu dostupna Međunarodnom krivičnom sudu za bivšu Jugoslaviju i licima uključenim u pružanje pomoći licima optuženim od Međunarodnog krivičnog suda za bivšu Jugoslaviju (prvo čitanje)

U uodnim napomenama predsjedavajući Doma podsjetio je na Izvještaj nadležne komisije i veliki broj usvojenih amandmana, te da su zbog toga poslanici dobili prečišćeni tekst ovog zakona.

U raspravi u prvom čitanju učestvovali su: Momčilo Novaković, Tihomir Gligorić i Mirsad Sipović. Zatim je, sa 25 glasova za, dva protiv i pet suzdržanih (iz Federacije za 16, iz RS 9), usvojen Prijedlog zakona u prvom čitanju.

Usvojen je i prijedlog predsjedavajućeg da se pređe u drugo čitanje.

Bez rasprave u drugom čitanju, usvojen je zakon, koji se, nakon usvojenih amandmana, naziva: Zakon o primjeni određenih privremenih mjera radi efikasnog provođenja mandata Međunarodnog krivičnog suda za bivšu Jugoslaviju te drugih međunarodnih restriktivnih mjera.

**Ad – 9:** Prijedlog zakona o dopunama Zakona Bosne i Hercegovine o izvršenju krivičnih sankcija, pritvora i drugih mjera (prvo čitanje) – predlagač: poslanik Momčilo Novaković

Nakon uvodnih napomena, Momčilo Novaković govorio je u svojstvu predlagača.

U raspravi su učestvovali: Mirsad Sipović, Momčilo Novaković, Marija Perkanović, Tihomir Gligorić, Beriz Belkić, Šefik Džaferović, Jozo Križanović i Selim Bešlić.

Nakon rasprave, predsjedavajući je proveo glasanje o Prijedlogu zakona u prvom čitanju.

Za je glasalo 13, protiv 11, suzdržala su se dva poslanika. Iz Federacije BiH za su glasala četiri, iz Republike Srpske devet poslanika.

Predsjedavajući je konstatirao da Prijedlog zakona nije dobio entitetsku većinu i da slijedi postupak usaglašavanja u Kolegiju kao komisiji.

**Ad – 10:** Prijedlog okvirnog zakona o visokom obrazovanju u Bosni i Hercegovini, sa Izvještajem Ustavno-pravne komisije (predlagač: poslanik Momčilo Novaković)

Predsjedavajući Špirić podsjetio je da Dom treći put dobiva negativan izvještaj Ustavno-pravne komisije o Prijedlogu ovog zakona.

Nije bilo rasprave, pa je predsjedavajući Izvještaj Komisije dao na glasanje.

Za Izvještaj je glasalo 17, a protiv 11 poslanika. Po entitetima, iz Federacije BiH za je glasalo 15, iz Republike Srpske dva poslanika.

Predsjedavajući je konstatirao da Izvještaj Ustavno-pravne komisije nije dobio entitetsku većinu te da će biti proveden postupak usaglašavanja.

**Ad – 11:** Prijedlog zakona o dopuni Zakona o porezu na dodatu vrijednost, sa Izvještajem Komisije za finansije i budžet (predlagač: poslanik Dušanka Majkić)

Poslije uvodnih napomena predsjedavajućeg, Dušanka Majkić diskutirala je u svojstvu predlagača zakona.

U raspravi su učestvovali: Ljiljana Milićević, Dušanka Majkić i Mirsad Sipović. Zatim je predsjedavajući Izvještaj Komisije dao na glasanje.

Za Izvještaj glasala su 22, a protiv osam poslanika. Iz Federacije BiH za je glasalo 14, iz Republike Srpske osam poslanika.

Predsjedavajući je konstatirao da je Izvještaj Komisije za finansije i budžet usvojen i da je time pao Prijedlog zakona iz ove tačke.

**Ad – 12:** Izvještaj Ureda za reviziju finansijskog poslovanja institucija BiH o izvršenoj reviziji:

- a) Ureda za veterinarstvo BiH,
- b) Ustavnog suda BiH,
- c) Komisije za otvaranje i prihvatanje ponuda za korisnike budžeta institucija BiH,
- d) Programa revitalizacije zgrade institucija BiH,
- e) Arhiva BiH,
- f) Komisije za imovinske zahtjeve raseljenih lica i izbjeglica – CRPC,
- g) Ministarstva finansija i trezora BiH,
- h) Parlamentarne skupštine BiH,
- i) Komisije za zaštitu nacionalnih spomenika BiH,
- j) Visokog sudskog i tužilačkog vijeća BiH

U uvodnim napomena predsjedavajući Špirić rekao je, uz ostalo, da je ovo posljednjih deset izvještaja o reviziji finansijskog poslovanja institucija BiH, te naglasio da se na ovoj sjednici, uz komisijske izvještaje o svakom izvještaju o reviziji pojedinačno, usvaja i glavni izvještaj Komisije za finansije i budžet koji se odnosi na izvještaje o reviziji svih institucija, sa zaključcima i preporukama sadržanim u Izvještaju.

Nije bilo rasprave.

Dom je, sa 30 glasova za i dva suzdržana, usvojio izvještaje o reviziji za institucije iz ove tačke, sa glavnim izvještajem Komisije i izvještajima Komisije o svakoj instituciji pojedinačno, sa zaključcima i preporukama sadržanim u izvještajima.

**Ad – 13:** Razmatranje:

- a) Izvještaja o učešću pripadnika Oružanih snaga BiH u operacijama podrške miru u 2005., sa Zaključkom Predsjedništva BiH,
- b) Odluke Predsjedništva BiH o upućivanju policijskih snaga Bosne i Hercegovine u operaciju podrške miru Ujedinjenih naroda u Sudanu.

Predsjedavajući Špirić skrenuo je pažnju na zaključke koje u Izvještaju predlaže nadležna Zajednička komisija za odbrambenu i sigurnosnu politiku.

U raspravi o ovoj tački učestvovali su: Jozo Križanović, Zlatko Lagumdžija i Momčilo Novaković.

Poslije rasprave usvojeni su:

- Izvještaj o učešću pripadnika Oružanih snaga BiH u operacijama podrške miru u 2005., (za glasalo 26, protiv tri, suzdržana dva),
- Odluka o prihvatanju Odluke Predsjedništva BiH o upućivanju policijskih snaga u operacijama podrške miru UN-a u Sudanu (za glasalo 29, protiv dva, suzdržana dva) i

- Odluku o opravdanosti i nivou nastavka učešća u postojećim operacijama podrške miru pripadnika oružanih snaga BiH u 2006. godini.

**Ad – 14:** Izvještaj o radu Zajedničke komisije za nadzor nad radom Obavještajno-sigurnosne agencije BiH za period april 2004. – decembar 2005.

O Izvještaju nije bilo rasprave. Usvojen je sa 29 glasova za i dva suzdržana.

**Ad – 15:** Izvještaj o aktivnostima na Projektu "Autoput na Koridoru 5c"

Predsjedavajući Špirić podsjetio je na zaključke koje u Izvještaju predlaže Komisija za saobraćaj i komunikacije povodom razmatranja Izvještaja iz ove tačke.

U raspravi su učestvovali: Zlatko Lagumdžija, Vinko Zorić, Tihomir Gligorić, Selim Bešliagić, Mladen Potočnik, Izet Hadžić, Muhamed Moranjkić i Sead Avdić.

Zlatko Lagumdžija i Mladen Potočnik su u raspravi predložili zaključke.

Predsjedavajući Špirić je, prije prelaska na glasanje, rekao da je prijedlog zaključka Mladena Potočnika usko vezan sa zaključkom Zlatka Lagumdžije, a što se tiče javne rasprave, da je određena zaključkom nadležne komisije. Zatražio je da Potočnik, ako insistira da se i o njegovom prijedlogu zaključka glasa, preda prijedlog zaključka u pisanoj formi. Zatim je proveo glasanje prvo o Izvještaju Ministarstva prometa i komunikacija, sa izvještajem nadležne komisije i predloženim zaključcima u tom izvještaju.

Za je glasalo 25, protiv tri, suzdržala su se dva poslanika. Predsjedavajući je konstatirao da je usvojen Izvještaj Ministarstva komunikacija i prometa, kao i Izvještaj Komisije za saobraćaj i komunikacije, sa sljedećim zaključcima:

1. Autoput na Koridoru 5c od strateškog je interesa za cijeli prostor Bosne i Hercegovine. Država Bosna i Hercegovina mora biti vlasnik sve studijske, planerske i projektne dokumentacije za izgradnju Koridora 5c. Obavezuje se Vijeće ministara BiH da ubrza cjelokupni postupak pripreme za izgradnju Koridora 5c i s tim ciljem odmah uradi sljedeće:

- a) formira jedinicu za implementaciju Projekta «Autoput na Koridoru 5c», odgovarajućeg kadrovskog kapaciteta koji će garantirati ubrzanje procesa;
- b) ubrza izradu cjelokupne projektne dokumentacije neophodne za izgradnju autoputa, iz osiguranih sredstava vrijednosti GSM licenci;
- c) intenzivira aktivnosti utvrđivanja i osiguravanja izvora finansiranja projekta. Ovo uključuje postupak ispitivanja interesa za dodjelu koncesije za izgradnju autoputa raspisivanjem javnog međunarodnog konkurentskog konkursa za dodjelu koncesije po modelu «Izgradi, upravlja i prenesi» (BOT modelu), uz mogućnost usvajanja i nekog drugog modela, zavisno od interesa ponuđača,
- d) izradi strategiju putne infrastrukture u Bosni i Hercegovini, s priključenjem putne mreže na Koridor 5c;
- e) pripremi prijedloge zakonskih i podzakonskih akata neophodnih za realizaciju Projekta: Zakon o autoputu na Koridoru 5c, Zakon o javnom interesu, Zakon o eksproprijaciji;
- f) počne pripreme za eksproprijaciju zemljišta i druge pripremne aktivnosti koje će omogućiti početak izgradnje autoputa u značajnom obimu, prema rezultatima Predstudije izvodljivosti.

2. Po potrebi, a najmanje jednom mjesečno, resorno ministarstvo informirat će Komisiju za saobraćaj i komunikacije o svim daljnjim aktivnostima na izgradnji Koridora 5c, a Komisija će, kada to bude potrebno, informirati Predstavnički dom.

S 33 glasa za i jednim suzdržanim, usvojen je zaključak koji je predložio Zlatko Lagumdžija, koji glasi:

**Zadužuje se predsjedavajući Vijeća ministara BiH da na narednoj sjednici Doma podnese ekspozu u vezi s izgradnjom Koridora 5c i svim onim što je prati, te o tome šta se namjerava uraditi do kraja ove godine na Koridoru 5c.**

Mladen Potočnik saglasio se da je i njegov prijedlog sadržan u prethodnom zaključku.

**Ad – 16:** Informacija o problemima, planovima i transferu novca za potrebne Regulatorne agencije za komunikacije BiH i Javnog RTV servisa BiH

Predsjedavajući je u uvodnim napomenama podsjetio poslanike na zaključak Doma sa 69. sjednice, koji je usvojen na prijedlog poslanika Lagumdžije, kojim je od Vijeća ministara BiH zatražena predmetna informacija, te naglasio da informaciju nismo dobili ni nakon intervencije zaključkom sa 74. sjednice Doma.

Kako je u raspravi o prijedlogu dnevnog reda dogovoreno da se ne vodi šira rasprava, Dom je usvojio sljedeći

### **Z A K L J U Č A K**

Shodno zaključku Doma sa 69. sjednice, održane 25. oktobra 2005., Predstavnički dom Parlamentarne skupštine BiH zahtijeva od Vijeća ministara BiH da za narednu sjednicu Domu dostavi pisanu informaciju o problemima, planovima i transferu novca za potrebe Regulatorne agencije za komunikacije BiH i Javnog RTV servisa BiH, kao i informaciju o drugim pitanjima vezanim za Regulatornu agenciju za komunikacije BiH (kontrola SIPA-e i dr.), koja su pokretali poslanici na 74. i 75. sjednici.

**Ad – 17:** Pregled zaključaka usvojenih na sjednicama Predstavničkog doma Parlamentarne skupštine BiH u ovom mandatnom periodu, zaključno sa 73. sjednicom

Ni o ovoj tački nije vođena rasprava, već je usvojen sljedeći

### **Z A K L J U Č A K**

Vijeću ministara BiH ponovo će biti upućena urgencija sa zahtjevom da se do naredne sjednice Doma izjasni koji su zaključci Predstavničkog doma realizirani, uz dostavljanje zaključaka koji su usvajani integralno sa izvještajima komisija i zaključaka plenarnih sjednica oba doma Parlamentarne skupštine BiH.

**Ad – 18. i 19:**

Fatima Leho, Jelina Đurković i Vinko Zorić imenovani su u Zajedničku komisiju radi usaglašavanja identičnog teksta:

- Budžeta institucija BiH i međunarodnih obaveza BiH za 2006. i
- Zakona o izvršenju Budžeta institucija BiH i međunarodnih obaveza BiH za 2006.

**Ad – 20:** Davanje saglasnosti za ratifikaciju:

- a) Ugovora između Bosne i Hercegovine i Republike Makedonije o pravnoj pomoći u građanskim i krivičnim stvarima,
- b) Ugovora o zajmu između Bosne i Hercegovine i Evropske investicione banke – Nacionalni put Banja Luka – Gradiška,
- c) Memoranduma o sporazumu između Vijeća ministara BiH i Vlade Republike Slovenije o proširenju donirane pomoći Bosni i Hercegovini u 2001.,
- d) Ugovora o zajmu – Regionalni projekat željeznica između Bosne i Hercegovine i Evropske banke za obnovu i razvoj,
- e) Protokola 14. uz Konvenciju o zaštiti ljudskih prava i osnovnih sloboda, koji se odnose na dopunu sistema za kontrolu konvencije.

Martin Raguž je, u svojstvu predsjedavajućeg Komisije za vanjske poslove, rekao je da je ova komisija podržala akte iz ove tačke dnevnog reda, nakon što je dobila objašnjenje od predstavnika Ministarstva finansija i trezora BiH i Ministarstva civilnih poslova BiH, pa je predložio da Dom da saglasnost za ratifikaciju. Predložio je da Dom osnaži zaključak Komisije **kojim će se od Vijeća ministara zatražiti plan prioriteta u ukupnoj infrastrukturi za BiH, kao i plan ukupnih kreditnih aranžmana i da te dokumente dostavi na razmatranje nadležnoj komisiji Doma.**

Nije bilo rasprave.

Dom je dao saglasnost za ratifikaciju svih akata iz ove tačke, uz prihvatanje zaključka Komisije koji je iznio Martin Raguž.

**Ad – 21:** Informacija SIPA-e o tragediji porodice Abazović iz Rogatice

Kako je Informacija koju je dostavila Agencija za istrage i zaštitu označena kao povjerljiva, predsjedavajući je zamolio da u sali ostanu samo poslanici, kako bi sjednica bila nastavljena.



U raspravi o ovoj tački dnevnog reda učestvovali su: Momčilo Novaković, Petar Kunić, Tihomir Gligorić, Beriz Belkić, Jelina Đurković, Nikola Špirić, Jozo Križanović, Mehmed Žilić, Martin Raguž, Petar Kunić i Mirsad Sipović.

Nakon rasprave, jednoglasno je usvojen sljedeći

### **Z A K L J U Č A K**

**Predstavnički dom Parlamentarne skupštine BiH zahtijeva od Vijeća ministara BiH i resornog Ministarstva sigurnosti BiH da otvore istragu o tragediji porodice Abazović iz Rogatice i o tome Domu podnesu informaciju.**

**Rok za podnošenje informacije je 30 dana.**

Ovim je, u 17,00 sati, završena 75. sjednica Predstavničkog doma.

Sastavni dio Zapisnika je transkript sjednice.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**dr. Nikola Špirić**